



09-09-2019

Suliap nr. 2019-18847

Akt nr. 11481090

Postboks 1340

3900 Nuuk

Tlf: (+299) 34 50 00

Fax (+299) 32 93 98

E-mail: nap@nanoq.gl

[www.naalakkersuisut.gl](http://www.naalakkersuisut.gl)

Inatsisartunut ilaasortaq  
Steen Lynge , Demokraatit  
/Maani

## **Amerikamiut præsidentiata soqutiginninna pillugu § 37 naapertorlugu apeqqummut akissuteqaat**

Asasara Steen Lynge

Inatsisartut Suleriaasissaanni § 37 naapertorlugu Naalakkersuisunut Amerikamiut præsidentiata soqutiginninna pillugu apeqquteqarsimavutit. Apeqqutit uannut akineqartussangortinneqarsimapput. Aatsitassanut Suliffeqarnermullu Naalakkersuisoq, Inuussutissarsiornermut, Nukissiuuteqarnermut Ilisimatusarnermullu Naalakkersuisoq kiisalu Aningaasaqarnermut Naalakkersuisoq apeqqutivit akiniarnerannut suliassaqarfinnut arlaqartunut tunnganeri pillugit ilanngunneqarsimammata paasissutissiissutigisinnavaara.

### **1. USA-p præsidentiata Donald Trumpip Kalaallit Nunaannik soqutiginnilluni takutitsinera Naalakkersuisut sunik periarfissaqartutut isigaat?**

Akissut: Issittoq qangali soqutigineqalerpoq, kiisalu silap pissusaata allanngoriatornerani Issittoq soqutigineqaleraluttuinnarluni. Maanna Kalaallit Nunaat aamma ukkatarineqaqqilerpoq, tamannalu atorluassavarput. Tassami niuernerup, ilinniarnerup, ilisimatusarnerup aningaasaliinerullu iluanni suleqatigiinnissamut nutaanik periarfissanik ammaassimmat. Tamakku iluanni suleqatigiinnerit pioeresut aappaagu Amerikamiut sinniisutitaqarfiat ammarneqarpat suli patajaallisarneqarnerussapput. Naalakkersuisut isumaat tassaavoq Amerikamiut sinniisutitaqarfeqarneratigut USA-mi oqartussat nunatsinni inuiaqatigiinnik paasinninnerulissasut kiisalu suleqatigiinnerup annertusinissaanut periarfissat takusinnaanerulissallugit.

### **2a. USA-mi pisortat Kalaallit Nunaat illersornissakkut aatsitassarsiornikkullu soqutiginartutut oqaatigimmassuk Naalakkersuisut USA-p suleqatigineqarnerulersinnaanera takorloorpaa?**

Akissut: Aap, aamma periarfissat taakku piviusunngortinniarlugit Naalakkersuisut sulissuteqalereerput. Ilaatigut Inuussutissarsiornermut, Nukissiuuteqarnermut Ilisimatusarnermullu Naalakkersuisoqarfik inatsisitigut pituttuisunngitsumik nukissiuuteqarnermut tunngasunik Amerikami nunanut allanut ministereqarfik suleqatigiinnissamut siunortalimmik atsioqatigiippot, matumanilu uulia gassilu eqqarsaatigalugit. Suleqatigiinnerut tunngatillugu taaneqarsinnaasut ilagaat naammassisinnaasanik annertusaanerit aningaasaliinerillu siuarsneri. Taakku saniatigut Aatsitassanut Suliffeqarnermullu Naalakkersuisoqarfik aatsitassarsiornermut tunngasunik ilisimatuussutsikkut teknikkikkullu ilisimasanik paarlaasseqatigiinniarlutik Amerikami nunanut allanut ministereqarfik pituttuaanngitsumik atsioqatigiippot. Kiisalu Naalakkersuisut ilinniartitaanermi paarlaasseqatigiinnissamut USA-mik suleqateqarput.

### **2b. Naalakkersuisut sulissutiginiarnerlugu præsident Donald Trumpip Kalaallit Nunaannut tikeraartinnissaa, taamaasillutilu USA-mi pisortat paasitillugit Kalaallit Nunaata sulissutigigaa aningaasarsiornikkut namminilernissaq danskit bloktiskudiat isumalluutigiunnaarlugu?**

Akissut: Nunat allat siuttui nunatsinnut tikeraarnissaminut tikilluaqqusaajuaannarput taamaaliornikkullu nunarput nunatsinnilu inuiaqatigiinnik ilisimasaqalersinnaallutik.

Naalakkersuisut paasinninnerat unaavoq, tassa USA-mi pisortat, matumanit U.S. State Department, Department of Defense aamma Amerikap Københavnimi aallartitaqarfia aningaasaqarnikkut kiffaanngissuseqarusulluta namminiilivinnissatsinnullu suliavut ilisimareeraat.

**2c. Naalakkersuisut sulissutiginiarnerlugu præsident Donald Trumpip Kalaallit Nunaannut tikeraartinnissaa, taamaasillutillu USA-mi pisortat paasitillugit Kalaallit Nunaata naalakkersuinikkut namminersulivinnissaq sulissutigaa?**

Akissut: Apeqqut 2b-mut akissutigineqartoq innersuussutigineqarpoq.

**2d. Naalakkersuisut sulissutiginiarnerlugu præsident Donald Trumpip Kalaallit Nunaannut tikeraartinnissaa, taamaasillutillu USA-mi pisortat paasitillugit Kalaallit Nunaata sulissutigigaa tunngaviusumik inatsiseqalernissamut siunnersuut, ullumikkut Tunngaviusumik Inatsisisaq pillugu Isumalioqatigiisitamit suliassaasoq?**

Akissut: Apeqqut 2b-mut akissutigineqartoq innersuussutigineqarpoq.

**2e. Apeqqutit 2a-miit 2d-mut ilaat ataaseq arlallilluunniit naaggaarneqassagaluarpata sukumiisumik naaggaagaq tunngavilersoqquneqarpoq imaluunniit naaggaakkat tunngavilersoqquneqarput.**

Akissut: Apeqqutinut 2a-2d-mut akissutit innersuussutigineqarput.

**3. Danskit naalakkersuisuisa pinngitsoortissinnaanerlugu - Kalaallit Nunaata suleqatigiinnissamut periarfissarsiorluni siunissami naalakkersuinikkut namminersulivinnissaa siunertaralugu nunanik allanik oqaloqateqartalernissaa? Taamaattoqarsimappat tamanna sukumiisumik tunngavilersoqquneqarpoq.**

Akissut: Namminersorlutik Oqartussaanerup 21. juni 2009-mi eqqunneqarnerani, Namminersornerullutik Oqartussaqarneq pillugu inatsit aamma Piginnaatitsinermut inatsit maannakkut atuuttumit Namminersorneq pillugu inatsimmit taarserneqarput. Inatsit tunngaviusoq peqatigalugu Namminersorneq pillugu inatsit Naalakkersuisut naalagaaffimi inatsisitigut inissisimavigaat.

Namminersorneq pillugu inatsimmi kapitali 4-mi Naalakkersuisut nunanut allanut politikkimut piginnaatitaaffii inatsisitigut tunngavissillugit aalajangersarneqarput.

Namminersorneq pillugu inatsisip aallaqqaasiutaani allaqqavoq inatsit Naalakkersuisut danskillu naalakkersuisuisa assigiimmik illuatungeriillutik isumaqatigiissutigigaat kiisalu kalaallit inuiaat inuiattut akuerineqassasut nunat tamalaat akornanni inatsisit isumaqatigiissutaasut naapertorlugit namminerlu aalajangersaasinaasut. Inatsimmut nassuaatini allaqqavoq inatsisitigut oqaasertat inatsisip ilagilliunnaraat aammalu aalajangersakkanik ataasiakkannik nassuaanernut aqtsisuullutik, kapitel 4 ilanngullugu.

Nunanut allanut tunngasut kiisalu isumannaallisaanermut aqtsinermut tunngasut pineqartillugit qallunaat naalakkersuisuisa Naalakkersuisut taamaammat peqataatittussaavaat. Naalakkersuisut qallunaallu naalakkersuisui suleqatigiippuit

Kalaallit Nunaata soorluttaaq Kunngeqarfiup Danmarkip ataatsimut soqutigisaasa qulakkeerneqarnissaat siunertaralugit.

**4. Allanik suliamut tunngasunik soqutiginaateqarsinnaasunik Naalakkersuisut paasissutissiisinjaappat?**

Akissut: Ulluni 8. – 12. september 2019-imi USA-mut Naalakkersuisutut siullermeerlunga tikeraassaanga. Sulianik kiisalu USA-p nunatsinnik atuineranik ilisimatinneqarnissaq tikeraarnermi sinnisoqarfiup naapinnissaanut siunertarineqarpoq. Washington D.C.-mi kalaallit Amerikamiullu ilisimatusarnermut suleqatigiiffianni isumasiorfimmi The Wilson Centerimi isumasioqatigiinnermi aamma pingaarnertut oqalugiartussaavunga. Washington D.C.-mi ataatsimiinnerit kingorna Bostoniliassaanga, tassanilu Harvard University's Kennedy School ataatsimeeqatiginissaa pilersaarutaalluni. Angalaneq Mainemi naggaserneqassaaq, ilaatigut The Council on International Educational ataatsimeeqatigissavara kiisalu Eimskipip umiarsualiviit atortagai aqqusaariarlugit University of Maine, Darling Marine Center ataatsimeeqatigissallugu.

Med venlig hilsen  
Inussiarnersumik inuullaqqusillunga

Ane Lone Bagger



Nunanut Allanut Naalakkeeredisoq  
Naalakkersuisoq for Udenrigsanliggender